

## Margheta Monn-Caduff



Ils 24 da fevrer 1995 annunzian ils zenns giud clutger dalla parochiala la mort da nossa convischina Margheta Monn sesenta ella casa da s.Vigeli a Sedrun. Nossa seniora dalla val ha il Segner clamau a casa tier el. La Margheta ei naschida alla fin da l'auter tschentaner ils 28 da december digl onn 1899. Ses geniturs ein stai Gion Fidel Caduff da Ruera e Margheta naschida Bigliel. En cuminanza d'ina numerusa famiglia da nov affons ha ella passentau ina emperneivla affonza. Suenter ils usitai onns da scola tucca ei era ad ella da bandunar la stretga patria ed ir egl jester a gudignar il paun da mintgadi. A Disla ha ella dau l'entschatta e terminau pli lontan dalla casa paterna a Lucerna.

Igl onn 1923 marida ella il giuven Rest Valentin Monn da Sedrun. La giuvna famiglia crescha cun dus fegls e quater feglias. Lavur avunda sper il menaschi puril. Tier tut quella travaglia ha la Margheta mantenu siu fin humor. Fridas han era buca schanegiau la veta luvrusa e devoziusa dalla Margheta. Ella flurenta veta da mo siat onns banduna il fegl Placi quest mund ed il car mariu piarda ella gia igl onn 1963.

Suenter la prematura mort dil mariu resta la Margheta plirs onns persula en casa. Il november 1992 serenda ella, suenter cuorta dimora a Zarcuns, en casa da s.Vigeli a Sedrun. Ils 24 da fevrer termingescha la Margheta sia veta ella biala vegliadetgna da 95 onns. Ella ruaussi en la beada pasch celestiala.